

आकाशवाणी जयपुर-अजमेर  
प्रादेशिक समाचार  
दिनांक 14.08.2024 समय: 18.45 बजे

- 78वों स्वाधीनता दिवस काल जळसा सागे मणायो जावेला-प्रधानमंत्री दिल्ली मांय लाल किला ऊं तिरंगो झंडो फहरावेला।
- स्वतंत्रता दिवस रे मौके राज्य स्तर रो खास जळसो जयपुर रा सवाई मानसिंह स्टेडियम मांय राख्यो जावेला।
- चिकित्सा मंत्री मौसमी बीमारियां री रोकथाम सारू अहलकारां ने युद्ध स्तर माथे काम करण रा हुकम दीना-डिजिटल हैल्थ मिशन री सरूआत कीनी।
- प्रदेश मांय सेंटर ऑफ एकसीलेन्स फॉर सेरेमिक्स खोल्यो जावेला।

000

काल देश रो 78 वों स्वतंत्रता दिवस मनायो जावेला। प्रधानमंत्री नरेंद्र मोदी दिल्ली मांय लाल किला ऊं तिरंगो झंडो फहरावेला अर देश ने संबोधित करेला। स्वतंत्रता दिवस री पैली वाळी सिंज्यां राष्ट्रपति द्रौपदी मुर्मू अब ऊं थोड़ी देर पछे सात बज्यां देश ने संबोधित करेला। वां रा संबोधन रो आकाशवाणी रा पूरा नेटवर्क माथे प्रसारण कर्यो जावेला। रक्षा मंत्री राजनाथ सिंह ई आज सशस्त्र बलां रा अहलकारां अर कर्मचारियां ने संबोधित कीना। स्वतंत्रता दिवस रो राज्य स्तर रो जळसो काल जयपुर रा सवाई मानसिंह स्टेडियम मांय राख्यो जावेला जठे मुख्यमंत्री भजनलाल शर्मा झंडो फहरावेला अर परेड रो निरीक्षण करेला। जळसा मांय मुख्यमंत्री बेहतरीन सेवा सारू पुलिस री 2 महिला अहलकारां ने राष्ट्रपति पुलिस पदक दे र नवाज्जेला। राज्य रा सगळा जिलां मांय प्रभारी मंत्री अर प्रशासनिक अहलकार तिरंगो झंडो फहरावेला। आजादी री सालगिरह धूमधाम सागे मनावण सारू तैयारियां पूरी कर लीरीजी है अर न्यारी-न्यारी सरकारी अर ऐतिहासिक इमारतां ने सोहवणी रोशनी ऊं सजायी ज्यी है। स्वतंत्रता दिवस री पैली वाळी सांझ आज जयपुर रा एसएमएस स्टेडियम कने अमर जवान ज्योति माथे राजस्थान पुलिस बैंड री ओर ऊं जनता सारू देश भक्ति रा गीतां री धुनां माथे आधारित खास कार्यक्रम राख्यी ज्यो है।

000

हर घर तिरंगा अभियान रा तैत प्रदेश मांय आज ई न्यारा-न्यारा कार्यक्रम राख्यी ज्यो। मुख्यमंत्री भजन लाल शर्मा जैसलमेर मांय सोनार किला ऊं निकाळी ज्यी तिरंगा यात्रा मांय अखेपोल गेट ऊं हनुमान सर्किल ताई हाथ मांय तिरंगो झंडो पकड्यां शामिल व्हे र देश रा ऐका रो संदेश दीनो। रैली मांय बी. एस.एफ., थल सेना अर वायु सेना रा जवान, बॉर्डर होमगार्ड , एनसीसी कैडेट्स अर राजस्थान पुलिस रा जवान शामिल व्ह्या। तिरंगा यात्रा मांय उपमुख्यमंत्री डॉ. प्रेमचंद बैरवा, विधायक महंत प्रतापपुरी, जनता रा नुमाइन्दा, आला अहलकार अर आमजन ई सिरकत कीनी। जयपुर मांय पुलिस आयुक्तालय री ओर ऊं आज मोटर साइकिल रैली निकाळी ज्यी। जयपुर रा पुलिस कमिश्नर बीजू जॉर्ज जोसफ पुलिस कमिश्नरेंट ऊं ई रैली ने हरी झंडी बता र रवाना कीनी।

सवाईमाधोपुर मांय राख्यी ज्यी तिरंगा रन अर मैराथन दौड़ ने जिला कलेक्टर डॉ. खुशाल यादव अर एस.पी. ममता गुप्ता हरी झंडी बता र रवाना कीनी। अलवर रा जिला कलेक्टर आशीष गुप्ता जनता ऊं आप-आप रा घरां माथे तिरंगो झंडो लगावण री अपील कीनी। डूंगरपुर मांय आज जिला प्रशासन, परिवहन विभाग अर पुलिस विभाग री ओर ऊं ट्रेक्टर तिरंगा रैली निकाळी ज्यी, जिण मांय देशभक्ति रा गीतां बीचे जनता ने हर घर माथे तिरंगो झंडो लगावण रो संदेश दियो ज्यो। प्रतापगढ़ जिला रा पीपलखूंट मांय गांव वाळा नावं मांय बैठ र हाथ मांय तिरंगा झंडा ले र रैली निकाळी अर देश रा एका रो संदेश दीनो। श्रीगंगानगर मांय विधायक जयदीप बिहाणी री अगुवाई मांय तिरंगा यात्रा रैली निकळी ज्यी अर लोगां ने नशो नी करण री शपथ दिरायी ज्यी। गंगापुर सिटी मांय जिला कलेक्टर डॉ. गौरव सैनी अर एस.पी. सुजीत शंकर कलक्ट्रेट परिसर ऊं तिरंगा यात्रा ने हरी झंडी बता र रवाना कीनी।

जोधपुर मांय बी.एस.एफ. री ओर ऊं हर घर तिरंगा अभियान रो आयोजन करी ज्यो। ई अभियान रा तैत ऊंटां रा दस्ता माथे सगळां री निजरां रही। शाहपुरा रा देवखेड़ा मांय आजादी री लड़ाई मांय खास योगदान देवण वाळा केसरी सिंह बारहठ, जोरावर सिंह बारहठ अर कुंवर प्रताप सिंह बारहठ रा मान मांय तिरंगा यात्रा रैली निकाळी ज्यी। हनुमानगढ़ मांय हर घर तिरंगा शपथ रो कार्यक्रम राख्यी ज्यो। बाड़मेर जिला रा चौहटन मांय विधायक आदूराम मेघवाल तिरंगा रैली ने हरी झंडी बता र रवाना कीनी। पाली मांय जिला प्रशासन अर महिला अधिकारिता विभाग री ओर ऊं चित्रकला अर रंगोली होड़ राख्यी ज्यी।

000

राष्ट्रीय अंतरिक्ष दिवस रा सिलसिला मांय आज जयपुर मांय रन अप कार्यक्रम रा तहत सम्मेलन राख्यी ज्यो। जल शक्ति मंत्रालय अर राज्य रा जल संसाधन विभाग री ओर ऊं राख्यी ज्यो ई सम्मेलन मांय राज्य रा जल संसाधन मंत्री सुरेश रावत कह्यो के अंतरिक्ष विज्ञान री मदद लेवण ने बधावो देवण सारू ओ कार्यक्रम राख्यी ज्यो। वे कह्यो के जल संसाधन अर जल प्रबंधन रा हलकां मांय ई अंतरिक्ष विज्ञान रो खास योगदान व्हे सके है। ई मौके रावत किसान साथी एप री सरुआत ई कीनी, जिण रे मार्फत पार्वती सिंचाई परियोजना रा कमांड हलकां रा किसानां ने फायदो मिल सकेला। कार्यक्रम मांय राज्य अर केन्द्र सरकार रा 100 ऊं बतता नुमाइंदा सिरकत कीनी। सम्मेलन मांय पाणी रा हलका मांय अंतरिक्ष रा योगदान परां वैज्ञानिक, इंजीनियर अर विद्यार्थी प्रस्तुतियां दीनी। ध्यानजोग है के लारला साल चांद रा दक्षिणी ध्रुव री सतह माथे कामयाबी सागे चंद्रयान उतारण री याद मांय केन्द्र सरकार ई साल 23 अगस्त ने राष्ट्रीय अन्तरिक्ष दिवस मनावण रो फैसलो कीनो है।

00000

विभाजन विभीषिका दिवस रा सिलसिला मांय प्रदेश मांय आज ई न्यारा-न्यारा कार्यक्रम राख्यी ज्यो। कोटा रेलवे स्टेशन माथे खास प्रदर्शनी लगायी ज्यी। इण मांय देश रा बंटवारा री बगत लोगां रे एक ऊं दूजा देश मांय आवण जावण ने फोटुआं रे मार्फत बतायी ज्यो है। सवाईमाधोपुर मांय लीड बैंक री ओर ऊं विभाजन की विभीषिका प्रदर्शनी लगायी ज्यी। मोटी तादाद मांय जनता फोटुआं री आ प्रदर्शनी देखण सारू पूगी। पाली रा प्रधान डाकघर मांय ई प्रदर्शनी लगायी ज्यी। डाकघर रा अधीक्षक आर सी मीणा बतायो के देश रा बंटवारा रे दौरान आजादी ऊं एक दिन पैली जो लोग शहीद व्हे ग्या, वां री याद मांय विभाजन विभीषिका स्मृति दिवस रे मौके आ प्रदर्शनी लगायी ज्यी। सिरौही जिला रा आबू रोड़ मांय केन्द्रीय संचार ब्यूरो री ओर ऊं आज विभाजन विभीषिका चित्र प्रदर्शनी सरू व्ही। सवाईमाधोपुर रा पीएम श्री केन्द्रीय विद्यालय मांय ई आज "विभाजन विभीषिका स्मृति दिवस" मनायी ज्यो। ई मौके विद्यार्थी विभाजन विभीषिका री याद ऊं जुड़्यो नाटक खेल्यो।

000

चिकित्सा मंत्री गजेंद्र सिंह खीवसर मौसमी बीमारियां री रोकथाम सारू अहलकारां ने युद्ध स्तर माथे काम करण रा हुकम दीना है। खीवसर आज अहलकारां सागे मौसमी बीमारियां ऊं जुड़ी मीटिंग मांय बोल रह्या हा। मीटिंग मांय चिकित्सा मंत्री राजस्थान डिजिटल हैल्थ मिशन री सरुआत ई कीनी। मीटिंग पाछे खबरनवीसां सागे बातचीत करता थकां खीवसर कह्यो के मौसमी बीमारियां री रोकथाम सारू साधनां री कमी नी राख्यी जावेला।

000

प्रदेश मांय सेंटर ऑफ एक्सीलेन्स फॉर सेरेमिक्स खोल्यो जावेला। खान सचिव आनन्दी आ जाणकारी दीनी। वे बतायो के प्रदेश मांय सिरेमिक खनिजां रा भण्डार मौजूद है। खान विभाग रा निदेशक भगवती प्रसाद कलाल बतायो के प्रदेश मांय 2 हजार मिलियन टन सिलिका मिनरल्स मौजूद है। सेंटर ऑफ एक्सीलेन्स फॉर सिरेमिक्स खुलण ऊं प्रदेश मांय शोध अर अध्ययन सागे चीनी मिट्टी उद्योग मांय नुवी तकनीक काम ली जा सकेला।

00000

राष्ट्रीय अंतरिक्ष दिवस रा सिलसिला मांय आज जयपुर मांय रन अप कार्यक्रम रा तहत सम्मेलन राखी ज्यो। जल शक्ति मंत्रालय अर राज्य रा जल संसाधन विभाग री ओर ऊं राखी ज्या ई सम्मेलन मांय राज्य रा जल संसाधन मंत्री सुरेश रावत कह्यो के अंतरिक्ष विज्ञान री मदद लेवण ने बधावो देवण सारू ओ कार्यक्रम राखी ज्यो। वे कह्यो के जल संसाधन अर जल प्रबंधन रा हलकां मांय ई अंतरिक्ष विज्ञान रो खास योगदान व्हे सके है। ई मौके रावत किसान साथी एप री सरुआत ई कीनी, जिण रे मार्फत पार्वती सिंचाई परियोजना रा कमांड हलकां रा किसानां ने फायदो मिल सकेला। कार्यक्रम मांय राज्य अर केन्द्र सरकार रा 100 ऊं बतता नुमाइंदा सिरकत कीनी। सम्मेलन मांय पाणी रा हलका मांय अंतरिक्ष रा योगदान परां वैज्ञानिक, इंजीनियर अर विद्यार्थी प्रस्तुतियां दीनी। ध्यानजोग है के लारला साल चांद रा दक्षिणी ध्रुव री सतह माथे कामयाबी सागे चंद्रयान उतारण री याद मांय केन्द्र सरकार ई साल 23 अगस्त ने राष्ट्रीय अन्तरिक्ष दिवस मनावण रो फ़ैसलो कीनो है।

000

बांग्लादेश मांय हिन्दू धर्म मानबा वाळां रे खिलाफ कथित अत्याचार अर हिंसा रे खिलाफ आज जयपुर रा परकोटा मांय 12 बज्यां ताई बाजार बंद राखी ज्या अर सर्व समाज री ओर ऊं रामलीला मैदान ऊं बड़ी चौपड़ ताई आक्रोश रैली निकाळी ज्यी। इण ऊं पैली रामलीला मैदान माथे सभा राखी ज्यी जिण मांय संत समाज ई सिरकत कीनी। सभा मांय रामधुनी करी ज्यी अर देशभक्ति रा गीत गायी ज्या। सवाईमाधोपुर, राजसमंद, नागौर अर कुछ ओर ज़िलां मांय इण ई सिलसिला मांय विरोध प्रदर्शन करी ज्या।

000

मुख्यमंत्री भजनलाल शर्मा आज भारत-पाक सरहद माथे बबलियान सीमा चौकी माथे पूग र सीमा रा पहरेदारां री हौसला अफजाई कीनी। मुख्यमंत्री बल रा अहलकारां ऊं सरहदी हलकां मांय हालात री जाणकारी लीनी। ई दौरान सरहद माथे तैनात महिला सीमा प्रहरी मुख्यमंत्री री कलाई माथे रक्षा सूत्र बाध्या। मुख्यमंत्री बल रा जवानां री बहादुरी अर मुस्तैदी री प्रशंसा कीनी।

000

राज्य मांय आज ई केई ठौड़ां बिरखा व्ही। टोंक मांय दोपहरां री बगत व्ही जोरदार बिरखा ऊं जिन्दगी माथे असर पड़्यो अर नीचला हलकां मांय ओजू पाणी भर ग्यो। बारां मांय आखा दिन कदे तेज तो कदे मझला दर्जा री बिरखा व्ही। जयपुर मांय संवारे री पोर हल्की बिरखा पाछे तावड़ो निकळ्यो पण सिंज्या री पोर जोरदार मेह बरस्यो। समाचार माण्डण ताई जयपुर मांय जोरदार मेह बरस रह्यो हो। ई बीचे मौसम विभाग आज टोंक, सीकर, नागौर, जयपुर, बीकानेर अर जैसलमेर, जिलां मांय कठे-कठे मझला दर्जा री अर कठे-कठे भारी बिरखा रा आसार जताया है। आं सारू ऑरेन्ज अलर्ट जारी करी ज्यो है। 20 ऊं बत्ता ज़िलां सारू येलो अलर्ट जारी करी ज्यो है।

00000

करौली रा पांचना बंधा रो पाणी भरतपुर रा घना केवलादेव राष्ट्रीय उद्यान पूग ग्यो है। पाणी री कमी ऊं जूझ रह्या केवलादेव मांय पाणी आवण ऊं झीलां भर गयी है। पाणी री रफ्तार तेज व्हेवण ऊं अजान बंधा रे जरिये पाणी मांय मछलियां, मेंढक अर दूजा न्हाना जिनावर ई आ रह्या है जो परिंदां सारू भोजन रो काम कर रह्या है।